



22. Aprili 2026

UPA2026/26

Tuniniaanissamik nittarsaassisarneq aamma nalunaaqutsersuisarneq pillugu Inatsisartut Inatsisaata allangortinneqarnissaa pillugu Inatsisartut Inatsisaata allangortinnissaa pillugu Inatsisartut inatsisaat (Tuniniaanissamik nittarsaassisarnermut inatsit)

(Toqqaannangitsumik ussasaarutit, influencer-it 15-it inorlugit ukiulinnut inerteqqutit, ukiukinnerusunut tuniniaanissamik nittarsaassinerit, taarsigassarsisitsinernit tuniniaanissamik nittarsaassinerit, atuisartoqarnermut tunngasumik oqartussat oqartussaassuseqarfiat, kinaassutsimik isertuussilluni saaffiginnissutit, akiliisitsinissamut suliat il. il.)

(Inuusutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoq)

Naalakkersuisut Tuniniaanissamik nittarsaassisarnermut inatsimmut aaqqiissutissanik allanguutissatut siunnersuuteqarnerannut Siumumiit qujaffigaakka, matumuunalu siunnersuummut Siumumiit siunnersuut imaattumik oqaaseqaateqarfigissavarput:

Naalakkersuisut tuniniaanissamik nittarsaassisarnermut inatsimmik siunnersuuteqarnermikkut, atuisut illersorneqarnissaat pitsanngorsarniarlugu kiisalu unammilleqatigiinneq naapertuilluartoq qulakkeerneqassasoq siunertaralugu allannguiniarput.

Tamanna Siumumit tunngaviatigut taperserparput. Atuisut tatiginnissinnaasariaqarput, suliffeqarfiillu pitsaasumik piunasaqaatillu naapertorlugit unammilleqatigiittariaqarput.

Kisianni taamatut siunertat tapersersorlugit aamma akisussaaffigaarput aperissallugu: siunnersuut una nunatsinni piviusumik atuutsinneqarsinnaava? Inatsit kusanartoq allaqqasoq kisiat pinnagu, aammali nunatsinni atuuffeqartariaqarpoq, taamaangippammi pappiliaannaalluni ilaannaanulluunniit atuussinnaanera aarlerinassaaq.

Inatsisip qanoq suliffeqarfinnut nunatsinniittunut sunniuteqarsinnaanera pillugu Siumut ernumassuteqarpoq. Qanoq Naalakkersuisut inatsisip suliffeqarfinnut mikisunut angivallaanngitsunullu nunatsinniittunut artukkiinnnginnissaa qulakkiissavaat? Nalunngilarput suliffeqarfiit amerlasuut killilimmik periarfissaqarlutik ingerlatsisut. Eqqarsaatigineqarsimava piunasaqaatit nutaat, malittarisassat nutaat, pisussaaffiit nutaat ulluinnarni qanoq sunniuteqassanersut? Imaluunniit aarlerinangila, suliffeqarfiit nunatsinniittut artorsarnerulernissaat, suliffeqarfiillu anginerusut nunanillu allaneersut ajornannginnerusumik naleqqussarsinnaanissaat?

Tamatuma saniatigut siunnersuut apeqqummik pingaarutilimmik pilersitsivoq, tassa qanoq inatsisip nakkutigineqarnissaa qulakkeerneqassava? Inatsit nakkutigineqanngitsoq annikitsumik sunniuteqartarpoq. Ullumikkut naammattunik nakkutiginninnissamut nukissaqarpugut piginnaasaqarpugullu? Taamatut pisoqanngippat, Naalakkersuisut qanoq tamanna qulakkeerniarpaat? Akissutunik erseqqissunik pisariaqartitsivugut, tassa kikkut nakkutiginnittussaappat, qanoq nakkutiginninneq ingerlanneqassava, aammalu qanoq aningaasaalersorneqassappat tamakku.



Taamatuttaaq eqqarsaatigisariaqarparput, qanoq niuernermi pissutsit ullumikkut ineriartorsimanersut. Nittarsaassineq annertusiartuinnartumik digitalikkut ingerlanneqarpoq, platformit nunani allaniittut atorlugit. Qanoq Naalakkersuisut qulakkeerissavaat, taakkua inatsisip ataani piviusumik pineqarnissaat? Taamaanngippat aarlerinassaaq pissutsit naligiinngitsut pilersinneqarnissaat, suliffeqarfiit nunatsinniittut malittarisassiuunneqartut, suliffeqarfiilli nunanit allaneersut akisussaaffeqanngitsut.

Siumup aamma § 9 b, imm. 1 sponsoreringimut tunngasup erseqqissarneqarnissaa. Matumani aalajangersagaq apeqqutinik amerlanerusunik pilersitsivoq akissutinik pinnani. Tapersiilluni aningaasaliisarneq qanoq piviusumik paasineqassava? Qaqugukkut tapersiineq nittarsaassinngortarpa? Qanoq qulakkeerneqassava malittarisassat sanioqqunneqannginnissaat? Pingaarnerpaatulli, qanoq Naalakkersuisut tamatuma nakkutigineqarnissaa qulakkeerusuppaat? Kikkut akisussaaffeqassappat, suullu sakkussat atorneqassappat?

Kiisalu immikkoortoq ataaseq Siumumit erseqqissumik oqaatigineqassaaq, oqaatsitsinnut tunngasoq. Inatsimmi § 8-mi allassimavoq nittarsaassineq pisortat akornanni ingerlanneqartoq sapinngisamik kalaallisut ingerlanneqassasoq. Siumumit tamanna oqaatsinik atuinnermut tunngatinngilarput kisiannili tunngaviusumik isummatsinnut tunngavoq. Siumumi isumaqarpugut nittarsaassineq nunatsinni ingerlanneqartoq minnerpaamik kalaallisut ingerlanneqartariaqarpoq. Tamanna innuttaasunut ataqqinninnermut tunngavoq, aamma tikikkuminassuseqarnermut aammalu inuiaqatigiittut kinaassutsitsinnut. Akuerisinnaanngilarput kalaallisut oqaatsitta atorneqarnissaat toqqarneqarsinnaasutut inissinneqarnissaat. Nunatsinni kalaallisut aallaaviusariaqarpoq.

Taamaattumik Naalakkersuisut aperissavagut, qanoq tamanna piviusumik atuutsinneqarnissaa qulakkeerneqassava, oqaatsillu pillugit aalajangersagaq sukannernerulersinneqarsinnaava?

Kiisalu Siumut isumaqarpoq pingaaruteqartoq nerisassanik nalunaaqutsersuisarneq pillugu nalunaarummi aalajangersarneqarsimasoq, tuluttut imaluunniit islandimiusut nalunaaqutsersukkat tuninianeqarsinnaasut, kisianni piumasaqaataalluni, paasissutissat taakku kalaallisut imaluunniit danskisut nutserneqarsimassasut aammalu innuttaasunut takuneqarsinnaasumik inissinneqarsimassasut. Taamatut piumasaqaateqarnermi tuluttut ilanngunneqartariaqartoq Siumumit isumaqarpugut. Tuluttut atorneqarsinnaanera isumaqarpoq, suliffeqarfiit nunatsinniittut Danmarkimut niuorneq kisiat pinnagu, kisianni aamma niuerfennut anginerusunut niuilersinnaanissaannik periarfissaqalersinnaasut.

Siumumut tamanna pingaaruteqartuuvoq, tassami inuussutissarsiornikkut ineriartortitsineq eqqarsaatigalugu periarfissat taamaattut atorneqartariaqarput.

Siumut aamma matumani MIO-mut tusarniaanermi akissuteqaateqarnerannut immikkut qujaniarpoq. Pingaaruteqarpoq meeqqat inuusuttullu eqqarsaatigalugit inatsisiliortoqarnissaa. Nittarsaassineq sunniuteqartarpoq, minnerunngitsumik inuusuttunut sanngiinnerusunut. Siumut MIO-p oqaaseqaatai taperserpai, naatsorsuutigaarpullu Naalakkersuisut taakkua pillugit erseqqissumik suliaqassasut.

Naggataatigut oqaatigissavara, Siumup inatsisip ullutsinnut naleqquttumik nutarterneqarnissaa kissaatigimmagu. Kisianni taanna naapertuuttariaqarpoq, atuutsinneqarsinnaasariaqarpoq aammalu nunatsinni pissutsinut naleqqussagaasariaqarpoq. Atuisut illersorneqassapput suliffeqarfiit



nunatsinniittut sanngiillisinneqarnatik, aammalu inatsit kinaassutsitsinnik takutitsisariaqarpoq tassani oqaatsivut ilanngullugit.

Maannamut suli apeqqutit pingaarutillit arlallit akissutissarsineqarnissaat pisariaqartipparput. Taamaattumik Siumumit siunnersuutip aappassaaneerneqartinnani Inuussutissarsiornermut ataatsimiitsitaliami suliarineqarnissaa inassutigaarput.

Lars Poulsen, Siumut